



CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
MAY 7 1940

T 3205/2331.83

9





吳江縣志卷之三十一

人物七

儒林

哈佛大學漢和圖書館珍藏印

張基

徐師曾

朱鶴齡

明

張基字德載名犯宣宗諱以字行父銓見名臣傳基少能屬文嘉靖十九年舉於鄉例得坊金百一日散親族略盡會試有顯者欲為之地基謝弗應父銓卒南安基千里奔喪哭踊幾絕服除當試念大母且耄不肯就道亡何大母死其婦劉亦死乃嘆曰母老矣誰與朝夕者自是步武不忍離會有島寇警奉母入郡得蘇舜欽滄

浪亭故址棲焉屏冠服爲野人裝於書無所不窺尤邃於經術晚而驗之身心多自得羅文恭洪先倡道東南同邑杜偉遊其門因以書徃復益明性命之旨常手條百戒懸之座右其要曰勿展無益身心之書勿綴無益身心之文勿吐無益身心之語勿與無益身心之事勿近無益身心之人勿用無益身心之物勿涉無益身心之境文恭以爲四勿翼云歲大稔有儲米數百石悉以賑飢者屬軍興宗人皆役基曰吾何忍獨以例免而煩族之老弱乎請於官毀家紓之自是資產寢薄知府王道來訪飯脫粟而去兵備蔡國熙嘗單騎造請退而嘆曰不圖今世有如此人知縣李遷梧嘗嘆曰邑中得張

先生等數人可使俗爲葛天畏壘矣其爲長吏敬服如此隆慶初詔求山林遺逸撫按援陳公甫例舉應詔基曰吾以母老不赴公車非爲名隱也必見撓者且負吾母入深山矣乃止基素攻內學體氣克壯忽一日預刻亡期書遺戒數行皆身後奉母事無他及至期端坐而卒年五十九基資性端厚學主持敬常言寄道者身奈何諱養生故兼修吐納之術沒後五日而殮色澤敷腴手足屈伸如常所著獨鑒廣願各一卷讀書疑二卷詩文二卷輯近思錄補正若干卷孝經大義一卷定性書感興詩注養生彙道要各一卷學者私謚爲靖孝先生崇禎十年御史祁彪佳表其行於朝特贈翰林院待詔

參獻集

徐師曾字伯魯七歲卽匡坐讀書授易義輒通大略十
 三歲能古文詞嘉靖二十六年中禮部試念父年老生
 母在淺土遂稱疾不對策歸葬其生母旋丁父艱終喪
 無越禮三十二年對策選庶吉士轉兵科給事中明年
 丁嫡母艱服闋補吏科凡所建白皆切時務垣長重師
 曾名德每事諮焉疏橐多出其手三十九年奉命冊封
 周藩閱歲歷轉左給事中時世宗春秋高嚴嵩父子用
 事齟齬言路師曾嘆曰吾諫官也循默失職豈周任之
 義耶會得疾遂屢疏乞休王志堅曰弁州名賢贊謂徐公以父母老不能直諫故歸而不知公之父母生母皆已前歿今據墓表正之闢書屋南湖上誦讀如諸生

隆慶五年疏請致仕萬曆初張居正柄國其同年也貽
 書勸之仕竟不答撫按奉部檄以原官迫之出復抗疏
 以老病辭又託所知言之銓曹乃已遂益肆力經籍前
 時禮記士子止用陳澔集說師曾芟繁訂誤折衷諸儒
 撰爲集註至今通行之所著又有周易演義正蒙章句
 小學史斷宦學見聞湖上集所輯有世統紀年六科仕
 籍吳江縣志經絡全書文體明辨詠物詩編臨川文粹
 大明文鈔共數百卷行於世又以字學不明欲緝篆籀
 諸體爲全編遂於醫術著論數十篇二者皆未成書師
 曾德器端醇不苟言笑學無不通根極歸於持敬常以
 主一無適揭其齋卒年六十有四遺命誡其子毋徇俗

尚求冥福太常王世懋表其墓曰徐魯庵先生之墓尚德故不書官

參文徵

朱鶴齡字長孺穎敏嗜學明季補諸生甲申後遂不復進取喜為箋疏嘗注杜少陵李義山集盛行於世其詩文亦與並時作者相雄長已而穆然思曰文章之學足以動一時不足以傳千古惟表章經義有功先聖賢為真儒所有事於是諸經之輯撰次第而起以朱子摛擊詩小序太過集諸家說疏通序義為毛詩古義二十卷以蔡氏釋書未精撰尚書埤傳十七卷以胡氏傳春秋多偏見鑿說乃合唐宋以來諸儒之解撰春秋集說二十二卷又以杜氏注左傳未盡合俗儒又以林注亂之

撰讀左日鈔十四卷易理至宋儒而已明然左傳國語所載占法皆言象也本義精矣而多未備撰易廣義略四卷其外又有禹貢長箋十二卷備論古今利害以為經國救時之資生平殫精書冊遺落世事晨夕一編行不識途路坐不知寒暑人或謂之愚遂自號愚庵嘗自謂疾惡如仇嗜古若渴不妄受人一錢不虛誑人一語云所著詩文亦名愚庵集年七十餘卒

參獻集續纂張尚瑗撰行狀

張尚瑗曰愚庵先生不銜已長不掩人善顧於早年輯杜之時爭名者謂拾蒙叟之緒餘及箋義山也又謂本釋道源遺書然虞山手札許杜註與已箋並行明各有同異也道源箋李不過數十條集中皆標而

出之先生當箋義山詩時兼得其文釐為五卷樊南因是有文集沒後三十年復有竊以饋友人謂別得善本而稍存朱氏之名於凡例似先生未嘗睹全書者凡險膚之徒攘臂瞋目與之競趨爭名者先生視之浮雲野馬不以介懷惟是行己大節終身肅如篤嗜古學至老不怠孜孜矻矻惟務合史子集諸編闡明經義其於詩文一道直外篇視之朱竹垞明詩綜論之曰長孺說經鏗鏗發揮集註傳註所未及顧自顧亭林汪鈍翁外罕有識者尚書埤傳亭林貽詩以伏生相况詩經通義鈍翁寓書謂可與嚴氏詩緝並傳惟註浣花玉溪二集乃盛行於時可謂知先生者矣

孝友

曹社

趙經

曹萬言

陳和甫

陳晉

莫轅

龐友諒 子鏞

徐季昭 兄昌伯

沈希旻

吳璋 元孫承恩

顧寬

沈奎

曹煒

申思稷

沈忠弟孝

陸恒

朱陞宣 子鑑

陸雲衢

屠嘉賓

周廷祚

蕭雲程

王尙仁

盧守善

吳蔡賢

朱家柱

屈啓潛

陳國珍

費大受

陳清

沈士麟

徐茂嘉友嘉聖嘉

沈自顯

曹天祿

徐杲

張維馨

嚴代言

陸維賢

宋

曹社字報徵庵村人性至孝父邁危疾日夜跪哺湯藥

兩膝皆腫時值盛夏假寐帳外恐風侵父不敢揮蚊全體如痛事聞於官將旌表孝行社曰此子職也何敢以要名乎力辭不受

趙經字六雅庵村人兄弟三人友愛甚篤父早歿經爲兩弟營理家業田廬什器已無所取盡以讓之人咸謂於弟過厚處已太苦經曰我長差能任事財產易致也弟年稚不與之得所將必失業流離我雖饒能安乎人服其義

曹萬言字詞峽庵村人生三月母呂氏患痢而亡及長痛不識母寢食涕流母忌日必悲號不食一日見隣兒患痢腹痛啼不止萬言因感念母亡痛苦必如是遂大

慟嘔血頓絕祖母蔣抱持不舍忽一乞者來視笑曰老
夫人母用悲傷須我兩口水足矣急索水嚙之果甦乞
者忽不見後蔣年一百一歲而沒萬言以孝行聞贈右
宣教郎

元

陳和甫延祐間人失其名

近其裔孫云名瑞

其慈母患風疾不

能言和甫走四方求醫莫治遂割股為糜奉之復禱於
神疾遂愈父客燕京疾篤和甫馳往顛天乞以身代及
卒徒步數千里函骨歸葬薦紳之士咸嘉其孝而歌詠

之

本獻集

陳晉字次翁元末張士誠竊據吳其父作詩刺之坐謗

訕論死晉請以身代父子爭死不決有司謂代父者孝
代子者慈慈孝之人安肯訕上遂兩釋之父尋病死既
葬猶朝夕哭至一日失明明洪武中晉妻家坐藍玉黨
事連及晉晉棄家遁去以存宗祀後遇赦歸孫讓事父
母亦盡于道鄉里稱為世孝云

明

莫轅字吳仲綺川人洪武中父繫詔獄當刑

朱鶴齡曰考莫禮以

洪武二十年授官此必洪武中年事也舊志云洪武初誤今正之

轅年十一詣理官請

代理官奇之試笞掠問誰教使轅略無恐言代父死豈
人相導理官遂奏釋其父而繫轅於獄父更為轅稱冤
闕下竟致瘐死而轅得釋季父侍郎禮寵貴用事時國

法嚴峻轅憂之勸祖諱散其家財兄輪不從乃謬指同
 姓隸洱海衛者為己族人皆怪之二十九年藍黨獄起
 祖諱與禮俱死於法家無脫者轅竟以前附尺籍得脫
 兄輪死遺二子雲霖皆在襁褓轅取而育之顛沛中保
 護甚至又變姓名潛入都竊其祖與叔遺骸潘裡章曰按莫志云
云蓋以諱與禮同死故也徐志改叔為屢冒法禁幾死
父父前已云瘦死矣何乃不及詳耶常以腦子自隨曰脫有急服之建文元年遇赦歸痛念
 家禍不御酒肉者數年隣失火延及母寢轅躍入火中
 抱母出鬚眉焦灼人至莫識其面姻親沈文度者萬三
 之曾孫也有女字陝人劉巡檢而文度坐事死家戍邊
 轅乃收養其女俟劉至而歸之隣有舉室死疫者獨一

幼子存疫癘易染人無敢視焉轅又收養之少從張適

易恒遊故長於學問讀書至老不衰為詩文有理趣卒

年七十七門人私諡曰貞孝先生參獻集

龐友諒字彥孚龐山人洪武中簽富民實京師友諒代

其兄友直以行已而母念不置具疏請允歸士大夫作

天錫歸養詩贈之景泰間吳中大飢友諒出粟若干石

助賑題賜冠帶子鏞字汝聲亦好施予成化十七年邑

中大水出粟千斛賑之弘治五年復大水出粟二千斛

賑之撫按嘉其好義不怠上其事於朝命有司榜其居

曰旌義復其家

徐季昭永樂中其兄昌伯坐事謫戍遼東家有老母季

昭請兄留養而以身代行昌伯曰爾少年不更事豈堪遠成二人互爭久之母竟遣季昭行後十餘年季昭還母兄尙無恙相見極驩鄉人稱之題其堂曰孝義

沈希旻永樂時人幼孤母奚氏撫之以至成立希旻既長與妻馮氏事母以孝聞母卒希旻命畫史寫真朝夕虔奉出告反面儼如生存吳驥其姻親也為贊美之比

於丁蘭云見獻集

吳璋字廷用年十一而孤母陸氏永樂二十一年詔選天下節婦給事內廷陸以年例行宣德四年舊志作元年誤此從

獻淮靖王出封廣東韶州後徙江西饒州陸皆隨行璋

壯而思親葉志云璋壯不授室諸書皆無之按吳氏譜璋訪母前已生二子妻亦力贊其行後歸而

生第三子洪今二子之後尙存日夜號哭棄家往來二州屢啓求見不

允時母子不相聞者二十年矣璋哀痛益切誓欲求見

正統十一年康王嗣立明年復冒死以懇王憐而許之

遂得入宮見母母時已疾革璋徬徨割股作糜進之病

稍間相持泣王聞益憫焉賜金幣勞遣之母至旅舍卒

乃負骨歸潛置舟中行至江遇大風舟將覆長年乃搜

得其母骸骨投之江璋躍入江抱母骸骨浮於水風頓

息同舟者感而救之得歸葬先墓哀慕終身璋多隱德

弱冠時有富室趙宗輝挾厚貲詣之偶遺金璋急往歸

之景泰間嘗為族人誣訟盡其產不與校或訝之璋曰

自有天定未幾族人遭疫蕩盡而璋家日起後子洪貴

封南京刑部主事卒年八十一贈太僕寺卿世稱全孝翁璋有元孫承恩字潤甫性至孝父邦棐為豪右挫辱憤結思報走都下死於逆旅承恩舁棺歸葬拊膺號慟曰父仇不復何以生為乃散千金結大俠許某擊殺其仇家久之里中有以飛章指斥其事者承恩不忍許抵罪傾其家會知縣徐元巡按荆某嘉其孝義釋之卒年八十六世謂孝子之子孫必復其始云

參獻集

顧寬字惟仁性孝友居母喪三年不入私室與弟宏俱八十餘歲不分爨初立弟子綱為嗣後生二子曰純曰綱而待綱如故族人灑貧不能存寬日給食歲給衣有故則資給以錢布終其身外祖李昱墓枕吳淞江屢經

水患寬出錢千緡築石捍之伯父壻錢璠死無葬地寬買地葬之及掘地得故冢命掩之而復擇他地其好義

又如此

參省志

沈奎字天祥性孝友母嘗苦目眚醫工謂不治矣奎亟舐之數月竟愈父寢疾奎侍之衣不解帶所親謂疫癘易染宜少就外舍洗櫛奎不可且戒其家勿以一切事關我而奎卒無恙諸昆弟及親戚有不足皆取資於奎一弟與妹壻且死撫其子尤有恩巡按御史王某聞奎行檄縣旌之書名於亭俾為眾法奎因益自晦治別業於柳胥村以終年五十七

本省志周恭肅集

曹煒字中美庖村人事嗣母陳至孝母暑月患背疽煒

日夜摩拭口吮之而愈事生母尤盡力奉養萬曆七年
歲飢出粟三百斛以賑代貧民輸稅銀七十餘兩又捐
田建冢以瘞枯骨有司上其行旌表孝義給賜冠帶

申思稷字汝文年十六父患囊癰思稷親吮之及卒哀
毀骨立母沒哭泣喪明於異母弟能讓金割產知縣劉
時俊題其堂為敦倫堂云時又有張思載顧爾察竝以

孝弟為時俊所表

本時俊居官
水鏡參申譜

沈忠與弟孝皆聖人善事其母常禱於天冀益母算每
受役於人所得肉皆懷歸以奉母知縣劉時俊潛得其
狀請於上官獎之時有石維城邵嗣永亦以孝著里黨
咸稱孝子

陸恒字貞甫

一作
惠誤

同里人學通五經萬曆三十六年貢

入太學祭酒李廷機拔其文第一為貴池訓導卒性篤
孝長洲陳淳為其父鯉畫像恒出必奉以隨後為人竊
去恒自傷無狀泣涕徬徨晝夜形仿遂成父像恒素不
知畫而像成惟肖人咸感嘆

見獻
集

朱陞宣字德升同里人十餘歲從父燾徙吳縣遂為吳

縣諸生萬曆四十年舉於鄉性至孝念父母老一再上
公車往返皆不過百日後母沒不復進取闔門侍養嘗
言士君子以不貪為寶能安貧則不貪甘食美服高閣
邃宇變童艷姬皆敗檢墮名之具也為孝廉二十年未
嘗以竿牘通守令家益貧布衣糲食泊如也惟奉親則

滌瀧裘葛無不贍具後父益老病幾殆陸宣侍寢食調
 治湯藥中單廁牖皆手承而進其前居母喪不入內不
 茹葷者三載後居父喪竟以哀毀成疾卒年五十六陸
 宣少與周忠介順昌同業後同舉氣誼甚篤皆以倫紀
 為己任熹宗時逆璫煽虐緹騎逮順昌親朋皆走匿獨
 陸宣經紀其家又周旋檻車追送之人服其義巡撫都
 御史周起元嘆為真孝廉以銀幣榜額命長吳二邑令
 往旌之陸宣詩文皆根柢道理沒後詹事姚希孟采羣
 議私謚為孝介先生崇禎十年巡按御史祁彪佳以陸
 宣與張基歸子慕三人行義同表於朝詔贈翰林院待
 詔子鎰字彥兼有學行甲申後隱於黃冠以卒

參獻集

陸雲衢字彥遠家貧力學授徒為養母患危疾雲衢顛
 天請代尋霍然父復苦癱瘓飲食皆親哺之潛割股和
 羹以進久之乃起鄉里上其事萬曆中巡按御史下檄

表之

見獻集

屠嘉賓字心益八斤人少孤祖大化鞠之母以夫死哭
 喪明嘉賓餽其翳久之豁然祖病危嘉賓割股和藥以
 進遂瘳人皆謂孝感萬曆中按臣徐某旌獎

本省志參錢志

周廷祚字長生父宗建見名臣傳宗建死於魏忠賢崇
 禎初廷祚入都為其父復讐請卹典時郭鞏以宗建之
 禍實自己倡屬馮銓謂廷祚曰苟無言當以一第及萬
 金相報廷祚曰父仇即死不避富貴可餌我耶遂疏劾

鞏得擬辟時法司以許顯純田爾耕崔應元先世軍功
 止擬絞廷祚赴法司大叫曰此輩慘斃諸忠尚不擬辟
 豈爾輩猶貪重賄耶法司悚然皆正典刑而宗建遂得
 贈太僕寺卿勅立祠建坊云後周延儒再相以內閣中
 書招廷祚謝不往福王立阮大鍼餌以職方主事廷祚
 力却之觸其怒幾不測其克守大節又如此參黃宗羲撰墓誌
 蕭雲程字漸于天性質厚崇禎十年巡按路振飛疏言
 雲程孝友性成母鄒氏病篤割股進藥沒而廬墓繼母
 施患痢顛神請代而卒獲痊族嫂孀貧割產贍給鄉人
 失金坐待完歸養喪夫之姪女莖受業之亡師皆宜旌
 厲詔可明年禮部侍郎顧錫疇復列其行命擢用不果

見獻集

王尙仁字桂暘少孤善事母年弱冠業賈起家萬餘金
 析其半與弟思則旣而思則怵於邪說以陰事中兄首
 縣罪且不測及事白弟坐誣知縣繩以法尙仁力爲求
 免弟聽乃泣訴曰如是則傷我母心矣願以身代弟知
 縣感其誠乃免思則罪事在崇禎中尙仁孫瀚字禹平
 少孤亦孝於母母卒哭泣過哀淚盡繼之以血晚年承
 祭猶歔歔洒涕云本屆志

盧守善太醫院御醫割股療母祈益母壽十年肉爲飛
 動母果踰十年至崇禎十三年年九十八終見府志

吳蔡賢爛溪人家貧織縑養親母患病醫禱弗效蔡賢

欲割肉作糜療母遂以刀自剖其胷入寸餘卽昏絕恍
惚見神人扶之復蘇覺有物自瘡口突出遂割之作糜
以進母病少瘥踰年卒蔡賢哀毀成疾猶力作養父未
幾亦卒年二十九

本府志
參屈志

朱家柱字楨卿汴溪人早喪父母與兄某友愛兄歿撫
兄子如已子皆爲婚娶成立之兄子疾視之夜不假寐
凡事必合已子後兄子而行終身不異爨年七十餘卒
家無餘財

屈啓潛字龍田性孝友父早喪母疾醫禱莫效割股作
糜以進乃痊兄弟四人皆同居通有無家庭雍睦四十
年如一日崇禎中年七十卒

本屈
志

陳國珍字公獻母失明僦居城外鬻餅以養崇禎十三
年家失火母不得出國珍號泣躍入從烟燄中抱持以
出皆頭額焦灼人不能識遂相繼死遠近傷之

見獻
集

大清

費大受字任寓居西操里善養親甲申乙酉間邑多盜
大受奉二親以避父老憊爲賊所得大受匿其母而奮
身詣賊求代賊不聽劫其父要藏金父無以應將兵之
大受以身蔽父賊怒將刃大受大受延頸受刃賊脅之
數四終不捨父賊感動嘆爲眞孝子併其父釋之後十
餘年邑令霍勳表其門將白之上官聞於朝大受堅
辭乃已以老壽終

見遂初
堂集

陳清字西雍邑諸生居盛澤兵至縛其父紀昌索金清從壁後躍出給之曰此吾家蒼頭也遂得釋而清徒手無以敵遂被殺

本獻集參錢志

沈士麟字餘光盛澤人性至孝幼知愛敬飲食不敢先嘗父母有怒色則嬉笑膝下令歡然乃已年十二父承源病刲股以奉得愈父沒繼母病篤士麟出禱佛寺請剖心以救人有見者驚告其家急往視之已血暈仆地矣後子母俱全康熙四十一年巡鹽御史雅某旌其門

見錢志下傳同

徐茂嘉友嘉聖嘉兄弟也居平望少孤事母屠氏盡孝康熙十二年母病兄弟願各減算十年以益母壽

茂嘉割股以進遂愈後十年母又病聖嘉割股以進越十年母又病友嘉與妻王氏亦割股進先後皆得愈後母年七十有四病篤聖嘉禱於神刺胷取心血湧倒地未幾復甦而母竟不起一門至性世尤難之

沈自顯字子發奎五世族孫世居仙里橋南九歲聞寇至隨父避難中途與寇遇砍其父仆地自顯抱父首泣求寇感動捨去後父歿廬於墓三年雍正三年旌表

本省

曹天祿母目雙瞽日以舌舐之目復明父沒屢痛絕既

葬復廬墓三年雍正八年旌表

見省志下二傳同

徐杲年十六被盜劫父去泣請身代不得負父屍歸痛

哭控當事盜捕獲伏誅雍正八年旌表

張維馨年十二父被盜劫冒刃蔽其父盜憐而捨之一

日父墜於急流維馨躍入抱之得出父病侍湯藥衣不

解帶者終歲及歿既葬哭墓側哀動行路雍正八年旌

表

嚴代言字友覺同里人諸生祖尚志字廷賢嘗為母吮

癰毒父被盜溺死訴於官得誅盜遂持其首以祭父孝

聞鄉里

本凌義渠撰傳

代言幼嗣於世父不逮養而養其本生

父母甚謹父患目障舌舐之半載復明父歿未葬而隣

家失火勢將及代言撫棺號哭誓以身殉火為之息乾

隆六年旌表

以上皆在分縣前

陸維賢名某八斤人幼喪母及長每念母輒流涕遇忌

日必悲號竟日事父盡孝家酷貧為里牙所得錢必以

具甘脆年逾壯不娶曰吾力任養父而已不能畜妻子

也父患中風十餘年時其飢渴寒煖及洗沐涕唾溲溺

之節恒先意而相之與父同臥一榻當暑夕不敢揮扇

冬則溫父足於懷父性喜觀劇每春時輒負父走鄰村

盡歡而返父既歿哭之嘔血喪三年無笑容後念嗣續

大義娶妻得一子終以痛父成疾逾年卒

朱鶴齡曰舊志所載諸孝行皆以刳心割股為事夫

聖賢言孝多矣未有及刳割者刳割而效亦非不敢

毀傷之正義不效則無救於親死而適自戕殺其身
 此委巷小民之所謂孝君子所不道也
 按刳心割股自明初以至本朝皆無旌表之典蓋
 以事非中道旌之則愚民轉相倣倣而傷生絕嗣者
 日多也是則傳其事以列於孝友於義固未當但其
 愛親之極殺身不顧一念之精誠足以感人心脾故
 宋元皆旌之而莫徐二志竝為立傳今亦循其例而
 錄朱說於前以正其事之失使觀者得有所戒懼云

吳江縣志卷之三十一

吳江縣志卷之三十一

人物八

節義

李真 子昱

徐孝祥

盛逮

吳成

戴天敘

葉紹袁 父重第子佺

顧祖奎 弟祖斗

沈義

汝可起

史記言

屈時進

吳易 徐鑛等

沈自炳 自駒 族弟自鋌

吳鑑

陳宗道 丁士俊 顧觀光
周邦彥 邦穆

顧之俊

龐霽

吳祖錫

張拱乾

王志學

子國安

汝子申

迮紹原

蘇兆人

楊菟

周新

元

李真字允真宋秘閣侍郎衡裔孫也年三十喪妻未及葬真他出家偶失火焚其棺真歸號痛收骸骨葬之而虛其右以自待終老不再娶子昱嘗輸粟百斛賑饑有司旌以冠帶辭不受人稱其世義云

徐孝祥家貧力學不求仕進嘗於廬後掘地見白金輒掩蓋居三十年為至治二年歲大飢乃盡發之以賑貧

乏全活不可勝計子純夫以明經發解仕至翰林供奉承旨孝祥受封如其官卒年九十七

明

盛逮初名棣字景華一都人父似祖有行義始居郡中

逮洪武初以賢良徵廷對稱旨賜冠帶命議事兵部視

能授官逮處斷剛正尚書陳寧忌之欲中以危法人勸

其少遜逮自若曰死生命也既而議格不行乃嘆曰仕

欲行志志不能行烏用仕為即辭疾歸四年寧出知蘇

州銜逮未釋令督辦通區逋賦逮傾貲代民償之弟彰

坐鹽法追捕甚急家人俱惶遽逮請於父曰弟未有子

逮有子請就捕後逮謫戍寧夏歷二十餘年歸卒於家

元末時逮有友唐自牧負張士誠官租二百餘石無力償度必死來與逮訣逮如數與之而自牧得全又有故

人睢州李幹以翰林待詔致仕無所歸逮延之家塾獻集

幹傳云依友人盛逮居一都蓋逮雖家郡中而故居仍在一都也及卒命子孫之受業

者持其喪買地黃山葬之其義行若此參姑蘇志張益撰行實

吳成尚書吳洪僕也洪為諸生時赴舉南畿成驅驢取

值以供旅費及洪為福建按察使有富人犯罪持千金

賂成求為寬解成却不受白其故於洪竟置之法由是

洪名益起洪後人感成德配食家廟

戴天敘字存南邑諸生嘗館陳氏陳故為人僕主者籍

其家陳囊金六百兩暮夜投天敘天敘以鐵缶瘞地中

既而陳死其妻踵門乞貸天敘曰若夫金故在盍取以

去其妻曰不知也天敘啓瘞還之其妻泣拜而去見獻集

葉紹袁字仲韶高祖紳見名臣傳父重第萬曆十四年

進士授玉田知縣縣有大獄重第心知其冤業經歷讞

求生路不得適巡按御史至為言冤狀終得釋出殊死

者十七人玉田人特祠祀之號葉公祠仕至貴州提學

僉事紹袁天啓五年進士時首輔顧秉謙實座主且同

鄉里或曰即謁之庶常可得紹袁曰進身之始豈可附

闈黨走權門乎即朝走謁而夕公卿吾不為也其人慚

而退例當得縣以不習吏事授南京武學教授改北國

子監助教陞工部虞衡司主事督盛甲廠兼城工已復

兼城守督胖襖監開九門河勞瘁甚至析家產爲京邸費念母在家年老遂乞終養歸屏跡汾湖濱與妻沈宜修菽水邀親歡閨門之內歌詠唱酬以爲樂巡撫都御史張國維備兵副使馮元颺凌義渠先後列薦章堅臥不起無何母與妻相繼沒幽憂憔悴杜門蕭然如枯衲乙酉八月一夕出門走餘杭之徑山荒刹薙髮爲浮屠已而依平湖母家馮氏村居止焉感愴鬱鬱成疾卒年六十貧不能殮中表馮洪業贖百金周其喪紹袁生有奇慧博覽羣書兼通釋氏宗教之旨生平口不言財利手不持鋤不識權衡初父重第遺田十餘頃紹袁自登第而宦宦而歸田存不及十之二子女十六人不免飢

寒而紹袁惟日手一卷吟哦不輟所著有天寥集欄塵集讀史碎金緯學辨義楞嚴集解金剛經參同契註等書藏於家子佺俗侗儻倅並有才佺字雲期能守父遺訓絕意進取然卒與諸弟並窮困早死聞者傷之幼子

變見文學傳

參獻集

顧祖奎字元度祖曾唯見名臣傳祖奎天啓元年舉人崇禎中選丹陽教授作五倫箴鏡板明倫堂以訓諸生陞連城知縣廉惠有異績黃道周作序頌之唐王立福州累遷戶部郎出知南寧府戮力職守時稱爲賢唐王死遂祝髮爲僧居隆安之林村後之肇慶卒於鼎湖山白雲庵年六十六弟祖斗與祖奎絕音問十餘年聞其

卒走萬里迎其骸骨挈其子與母歸故里人高其義祖
斗字文度諸生本蘇州先輩小傳同里先哲記參獻集顧譜

沈義業賣糕為人任俠仗義天啓六年周宗建被逮下
詔獄時逆璫威燄薰灼僮僕無敢從者義獨慨然隨侍
周旋橐餽不避危險宗建死於獄惟義買棺視其斂隨
叩鎮撫司領理許顯純曰此東廠第一讐人也不許越
七日始得出歸而向周氏述其殮狀云藉以絮襖覆以
青衣裹以單衾平幘蓋頭履鞮置足後周氏子姓頗疑
其言及崇禎五年冬將葬賜域啓旅櫬視之中所位置
悉如義言於是一時盛傳其事以為文文山之張義甫
不是過也蘇松兵備馮元颺奇其人檄至麾下崇禎末

年元颺巡撫天津題授都司僉書加副總兵銜後隱居
伏龍山而卒

汝可起字君喜黎里人崇禎朝以貢生入廷試時疆圉
多故右騎射莊烈帝臨軒親試之可起著儒服三發三
中的上善之時不次用人吏部循資格授常州府訓導
十五年冬南歸至河間府故城止郭外舍值哨騎四出
突入戶見可起岸幘危坐不少動曰汝官耶當降我降
即不死可起叱之曰豈有降人汝可起遂大呼崇禎聖
上數聲五指探舌血印壁上未成字騎遂刃可起可起
罵不止死按魏禧撰可起家傳可起宿韓生家本與同
行人燎薪向火及被刃什火中死韓生殯而
瘞年六十有五

史記言字伯顧仲彬九世孫有至性矜名節讀書至節
烈事輒嗚咽悲憤甲申聞莊烈帝之變大哭投河救免
後以國事死吳有涯以詩哭之有布衣奔國難句屈 本志

屈時進字剛中崇禎中由廣東按察司經歷陞四川梓潼
知縣路經福建大浦縣聞莊烈帝之變北面叩首曰君
死社稷矣臣何以生為遂絕粒而死大浦人義之葬縣

西郊見屈志

吳易字日生尚書山曾孫居二十九都少有才名負氣
矜奇兼好兵法通任俠雅不欲以經生自見間為詩文
傳誦士林非其好也崇禎十六年成進士不謁選而歸
明年聞北都失守易感憤作恢復議四篇洞晰形勢福

王立謁史可法於揚州可法異其才薦授職方主事監

紀軍前甚有勞績明年督餉吳中未還而揚州失已而

吳江亦失遂與同邑孫兆奎沈自炳自駟等號召舟師

聚眾數千人復吳江遣人守之屯軍長白蕩諸書並云長白蕩明

史因之按施世傑孫烈士傳云屯兵大漾今土人名老軍蕩以易屯兵得名其處與長白蕩相近也出沒

五湖三泖間嘗一攻郡城不能入 大兵來討易用計

沈其舟獲勝時部郎王期昇吳景直等奉通城王朱盛

徵起兵西山克長興居之兵不甚強皆倚易為助唐王

聞之授兵部右侍郎兼右僉都御史總督江南諸軍事

楊文驄奏易斬獲多進為兵部尚書魯王亦授易兵部

侍郎封長興伯官爵並本明史在乙酉年而獻集及殉國彙編並繫復起兵之後在丙戌年獻

集云時浙東兵起易乃收集潰散遙為聲援擢兵部侍郎尋有梅墩之捷晉兵部尚書封長興伯彙編云丙戌春易復集水軍一旅有周瑞者善鳥銃與陳繼俱隸易營三月二十三日巡撫土國寶遣副將汪茂功統兵八百來攻易檄瑞殲之思文褒其功擢兵部侍郎副都御史爵忠義伯先是魯監國亦遣使擢易兵部尚書封長興伯二書皆邑人所記而紀年並與明史異即官爵亦互有不同故附注於此以備參考八月總兵吳勝兆以舟師至易出戰塘口復獲舟二十次日大雨不設備為大兵所襲大敗父承緒妻沈氏及女皆投水死易子身走一軍盡殲明年易鄉人周瑞等後瑞以降被殺復聚眾長白蕩迎易入其營巡撫土國寶遣副將來討為瑞所敗八百人皆死軍聲復振其秋易至嘉善與職方倪撫合營集飲孫璋家偵者知之大兵猝至易被執至杭州總督張存仁甚重易館於署舍勸以官不應

勸以薙髮不許曰然則祝髮僧服乎乃聽之然卒不屈存仁表於朝命下戮於杭之草橋門將戮易北面再拜曰今日臣之志畢矣時年三十五無子妾阿香同時被執以死自守諸帥皆敬禮之後得釋歸老於柳胥故里自炳自駟自有傳兆奎見震澤志時與易同事者有徐鑛呂雲孚沈約華京趙汝珪朱旦逸史作吳旦誤周耀始沈璐諸人鑛字掌文西濠港人兵敗走寧波欲從海道入閩道梗復還明年與易潛約再起兵易被執鑛走武康山中死京字壯輿兵敗時先驅妻子入水格殺數人他卒繼至與手搏相持溺死汝珪字子玉旦字爾赤諸生鷺之孫二人皆戰死耀始字思橋縣東人秀水諸生與

易倡議城守城陷耀始擁護老弱出者甚眾後走充浦時號泣墟墓間未幾不食死璐字伯玉太常漢族曾孫與耀始同守東城 大兵至死之雲孚約不能詳

本明史獻

集戴笠殉國彙編黃宗義實錄抄
溫睿臨逸史周廷諤吳江詩粹

沈自炳字君晦副使琬子少有志操及長博學工文詞操筆千言立就在復社號為矚目崇禎甲申福王立南都詔求人才自炳獻賦闕下以恩貢授中書舍人復渡江往揚州與弟自駟參閣部史可法幕居月餘可法諮才於自炳自炳曰公贊畫推官崇德呂願良之子宣忠可可法問其狀自炳曰宣忠為人英敏剛方年雖少可任大事可法亟召之未至南都陷宣忠乃走謁魯王王

授參將使從吳易等起兵後敗不屈死人賢宣忠之節而重自炳之知人初自炳兄自徵知天下有變造漁船千艘於湖尋死及易謀起兵而自炳兄弟自揚州歸與易合謀遂部伍諸鄉民收其船以集兵自炳乃更造箭艘募水卒別立營與易為聲援後兩軍皆敗易亡走自炳赴水死年四十四自駟字君牧為諸生有名貌枯羸而性跌宕好任俠所交皆奇杰士時四方兵起自駟屢以救時切務陳當事而東南尚晏安人莫之用未久歲歉亂民興自駟即所居楊墳村做行朱子社倉法賑貸貧乏不數年旁近諸鄉民咸附焉其在可法幕見可法躬細務遇人媼以為非戡亂才故去而歸里既輔易

起事以易不謹斥堠日置酒高會數諫不聽輒仰天號
慟及兵潰亦赴水死年四十族弟自鋌字公捍以薦為
魯王行人吳易之封長興伯自鋌實奉命以來魯王敗
走歸遂隱居吳家港與諸高士為詩社以終

本明史黃宗義實錄

抄屈大均成仁錄家傳

吳鑑字子儀易族子也美鬚髯長身玉立為名諸生乙

酉大兵徇吳江知縣林嶠走歸閩縣丞朱廷佐

葉志不載

朱縣丞姓名而殉國彙編及逸史並作朱國佐此從南都縉紳錄

獻冊籍於軍前遂來

署縣事鑑聞之大怒徒手入縣庭罵廷佐廷佐執送蘇

州知府問其黨與曰張睢陽顏平原岳武穆方正學皆

是也問其頭目曰孔子孟子知府怒遂繫之獄誘使降

不從鑑從獄中與親族及易書辭義慷慨聞者感泣未

幾殺於胥門易傷之乃起兵執廷佐授其父汝延令殺

以祭鑑焉

本獻集家傳

陳宗道字夷甫授徒洞庭山甲申聞北都變涉淮以策

干當事不用遂歸時漕撫路振飛流寓洞庭宗道讓之

曰今日非公等偷閒時也乙酉夏途遇薙髮者直前罵

之為其黨所殺

見逸史

時有丁士俊顧觀光士俊字鰲卿

急水港人太學生崇禎十四年旱蝗嘗發粟二千斛助

賑乙酉秋遇弁逼令薙髮不從死之觀光字賓容分湖

人以乙酉夏遇大兵不屈死

周邦彥字念祖高祖大章見各臣傳邦彥為邑諸生以

世襲武職讓其弟邦穆明亡誓以身殉乙酉其母歿丙戌冬葬有日邦彥賦絕命辭一夕走投吳淞江死邦穆字子遠承世職以部劄亡赴京請授蘇州衛試百戶六輓漕有廉幹聲甲申後堅臥不起丙戌夏漕官馳檄強起之遂不食六日先其兄邦彥死

本詩粹周譜

顧之俊字仲容同里人崇禎十六年進士南都建國授奉化知縣乙酉大兵取杭州閏六月寧波刑部郎錢肅樂起兵守禦之俊應之時郡中監司守令皆逃獨推官羅心樸與之俊督餉有功明年六月魯王航海入閩之俊從亡晉官御史

先哲志云歸唐王為御史誤

以剛直著後入粵

從永明王死於肇慶

本錢肅樂正氣堂集參蘇州先輩小傳同里先哲記

龐霽字象六曾祖遠見名臣附傳霽少孤事大父秉道曲盡孝養崇禎十六年成進士授平湖知縣未幾鼎革歸里後同年陳名夏秉政屢欲薦起之終不就以卒

見屈志

吳祖錫字佩遠父昌期見名臣傳祖錫中崇禎十五年鄉試副榜貢太學時本生父昌時為文選郎中與周延儒比祖錫力諫不納昌時誅兩都相繼陷祖錫乃變名鉏字稽田從陳子龍徐孚遠等謀恢復子龍使偵事杭州有薦其仕國朝者祖錫乃逃匿長洲徐枋所旋為讐家縛至土國寶軍門時子龍死孚遠遁入海國寶乃薙祖錫髮縱之去祖錫為人偉岸目光如電善結客客

多歸之魯王聞其名授職方郎中永明王立官如故王
 死祖錫益鬱鬱不知所為復為人告捕其子下獄祖錫
 匿京師得免後乃與所結客居膠州大竹山會莊烈
 帝忌辰哭之慟下血遂不起乃召客與訣氣逆上語塞
 遂嘔血數升而卒久之歸葬

本楊賓
晞髮集

獻集續纂曰祖錫父昌時嗣父昌期並居嘉興故祖
 錫為嘉興貢生崇禎末遭家禍痛不欲生家財十萬
 盡散之以結客慕申包胥張子房之為人雖知不就
 意未嘗暫忘天情高邁神觀超然窘急不改其度能
 以片言使人意移即怨敵亦願為之死故屢蹈危難
 而卒自全乙酉後未嘗家居虎狼之叢蛟蜃之窟王

公曲室節使幕府無不棲托其中之所存人莫得而
 測也生平足跡半天下山川阨塞如指諸掌奇材烈
 士靡不結納自負匡濟大畧而無所試之竟賚志以
 沒

張拱乾字九臨縣治西人少沈潛好學為諸生有名遊
 金壇周鏢之門入復社福王時阮大鍼羅織善類尤憾
 鏢喉人疏參復社黨魁鏢遇害拱乾與沈壽民吳應箕
 等皆逮問會大兵南下得解薙髮令下拱乾與其父
 君美不奉制為鎮將吳勝兆所捕繫時捕繫遠近四十
 餘人以次受戮及拱乾父子勝兆忽沉思曰我稔知此
 人三吳才士也遂杖而釋之拱乾歸剪髮為黃冠謝諸

交遊不復出恒坐臥一小樓顏曰獨倚溧陽陳名夏素
 知拱乾既柄政言於朝以中書舍人徵不應作苟或
 田疇二論以見志有一子殤家益貧或餽之金帛輒麾
 去卒固窮以死年七十四鄉人私謚貞毅先生為文初
 學昌黎晚喜止齋同甫曰吾才小苦拘檢非此不足以
 拓心胸也

本張汝
瑚撰傳

王志學字仲求邑諸生有文譽崇禎中以流寇亂天下
 留意武備每與人談時事輒痛哭甲申夏聞莊烈帝之
 變引劍欲自裁家人力救得免明年南都亡魯王監國
 台州志學將往從之未至而大兵已破越志學在道
 被殺僕宋清收其骨以歸子國安痛其父之死而志不

得遂將入閩從唐王會唐王死福州國安至閩無所歸

遂躍入道旁井以死

本張尚
媛書事

汝子申失其名黎里人諸生為人負氣有大志所居瀕
 湖蕩申酉間頗多盜子申糾集鄉勇保障一方里人咸
 被其澤後為蜚語所中幾不免久之無證得釋乃教授
 鄉里居常鬱鬱恒若有不自得者年七十七危坐瞑目
 而逝子某讀書守義後為僧不知所終

見蘇州先
輩小傳

迺紹原字休仲蘆墟人邑諸生師事楊廷樞廷樞死蘆
 墟首縣於市紹原購其首得以成殮後楊氏祀廷樞於
 家以紹原配享

本獻集。按明史
附見楊廷樞傳

按郡城薛放壽蘆墟陳謨序云維斗先生殉節於翁

之鄉軍卒竊其首要重賂無敢抗論者翁獨廉知其
匿處奮身直入持首叱咤而出付其家不告姓名去
蓋當時紹原方出貲購廷樞首而卒復竊去要重賂
誤乃不平而往奪之也然則廷樞之得成殮誤與有
力焉而楊氏亦莫之知者特因其不告姓名故耳誤
字貞卿以諸生入監平生義行多此類

蘇兆人字寅侯吳江人也工詩乙丙間在閩撫張肯堂
幕府肯堂由鷺門入翁洲相魯王兆人自中書舍人晉
儀部郎肯堂築雪交亭於翁洲嘗語之曰此卽吾止水
也兆人對曰豈敢令相公獨死辛卯九月初二日翁洲
城陷兆人晨起謁肯堂示以絕命詞有云孤忠惟自許

義重一身輕且曰事竟至此兆人請先肯堂領之俄頃
肯堂呼其闔門二十七人以次畢命乃自投縲梁塵甫
動一卒趨告曰蘇儀曹死廡下矣肯堂曰取卮酒來酒
至酌兆人尸前而祝之曰君其待我復歸死亭中鄞人
聞性道入翁洲取亭中骨分男女納兩大甕合瘞之補
陀之茶山兆人骨亦附焉

按明史張肯堂傳附載同死者二十一人內有中書
舍人蘇州蘇兆人初不知其家吳江也吳江文若獻
并無有及兆人殉節者惟殉國彙編載其事於肯堂
傳亦但云蘇州人而已近鄞縣全吉士祖望撰翁洲
寓公詩小傳繫兆人於吳江謂本董守諭學蘭集高

宇泰雪交亭正氣錄張茂滋餘生錄且言他書稱兆人家吳江者尚多故今即用祖望撰傳序列於篇以俟再考又按殉國彙編兆人師事肯堂其官中書舍人即肯堂題授者寅侯作賓侯乃傳寫之誤

楊菀字碩父雪湖人自幼師湖州松仙精通數學人有問輒對以隱語後必奇中或匿其事問之對亦如響明末常熟瞿式耜巡撫廣西挾菀以行定靖江王之亂菀有力焉永明王時式耜以大學士畱守桂林菀亦在軍中為主客郎桂林破式耜死難菀麻衣徒跣哭於定南王孔有德門請殯葬不許哭四日欲繼以死王義之會給事中金堡已為僧亦上書請王遂聽棺斂瘞於北門

風洞山并瘞從死總督張同做時營帥李某劫式耜家屬大索財貨菀叱釋之卒護式耜孫還鄉後瞿氏以式

耜女配其子某 本錢志參殉國彙編昭文志

大清

周新字音來好義敢為康熙甲寅乙卯間八閩叛良家子女被掠者甚眾及賊平又為官兵所得夫覓妻子覓母者呼號接踵新時在浙撫陳某幕為之籌畫達諸康清王又謁督師閣部紀某請許民詣營認贖并告當事捐俸以助民得骨肉重聚者千家其他事多類此 本錢志

節義 吳省南

俞安期 子南史

周輯符

張世偉

卜舜年 莊汝培仲紹顏

潘一桂 子陸

湯三俊

沈自徵 兄自繼

沈自然

史元 趙渙

沈自南 子永義永智孫始

計東 子準從孫朱培

顧偉 章夢易

任大任

葉燮 屈運隆燮從子舒崇舒穎

潘耒 子其燦

徐鈞 父韞奇子養浩

陳銳陳鏗 鏗子沂震

李寅

周龍藻

周振業 族兄之方

周廷鏗 兄欽

周朱耒

顧我錡

元

王原傑字子英其先四世祖扈蹕南渡葬邑之陳思村

因家焉世業儒至原傑益以學行知名於世 明一統志云原傑學

遠行元至正四年以春秋領鄉薦值兵亂不仕教授於

鄉著春秋讞議貞白英華文集水雲清嘯詩集各若干

卷詩文雅健高古中書嚙子山稱其詩言近指遠而無

風雲月露之態識者以為知言子思忠亦有文學張士

誠據吳屢召不往率義勇保障鄉閭紀律嚴明刑賞允

當若素習兵事者至正末徐達率師東下頓兵石里而

單騎至城下諭降知州楊彝驚悚不知所為思忠謂曰

羣雄割據生民之禍極矣今王師弔伐禍自此弭又有
山卵之勢奈何不歸附乎乃與彝率衆降達嘉之賜思
忠旗章俾鎮守焉事平歸里

明

鄒奕字弘道祖士表好義多延名師教之楊維禎贈詩
有云豕孫十歲早能詩蓋美奕也奕秀目美髯貌若玉
雪善議論文詞高古元至正初舉鄉試第四刻詩義詩
疑天府賦各一道尋登進士調饒州錄事洪武初爲御
史出知贛州府建諸壇及館驛等規制略備坐事謫甘
肅二十餘年永樂初以蹇義薦召還與同郡沈繹丁晉
輩交最善有吳樵橐參獻集府志

朱應辰字文奎綺川人少習舉子業爲陳氏禮元末累
試不利乃棄之從楊維禎學古文洪武四年以薦應詔
起乞近地養親授本郡儒學訓導改常之江陰應辰爲
文繁而不猥詩工長短句篆籀法古嘗奉命書符印所
著有漱芳集三卷外孫都穆爲之刊行參列朝詩集

凌昌字正卿同里鎮人家世業儒性聰慧強記尤邃於
書微詞奧義多所發明從元儒潘如珪游至正間舉於
鄉會道阻遂不復就試以圖史自娛爲文章汪洋而明
潔放言極論一歸於理洪武十二年舉明經授縣學訓

導遷太平教授卒於官

同里先哲記云承部檄分教邑庠仍薦之當路未及祿位而卒

蓋教職猶未授祿故云

所著有儀古集子德修字子成洪武二十

一年舉明經初為嘉定訓導遷寧縣廣昌教諭吳驥稱其文章皆本義理如布帛菽粟之有實用壽終於家見獻集

黃本字本中先世自江夏徙蘇元末張士誠據郡城網羅才士本中避地同里授徒資養因家焉洪武中舉明經為武夷訓導歷會昌教諭於經史百家之書研極理趣文章豐腴雅馴詩詞藻麗典則無愧作者洵遭兵燹子孫流離遺橐僅存一二參獻集

梁時字用行同里人博學工文章以氣格為主不事纖麗亦善筆札少時遭家籍沒聚徒講學於長洲洪武二十一年以善書薦授岷府紀善永樂初遷翰林典籍修永樂大典充副總裁終於官有噫餘集

潘檉章曰按吳驥云時風流儒雅持身以禮雖席父兄之資不尚綺紈之好既罹家禍安貧晏如屬文賦詩清粹有法楷書行草各臻其妙夫云席父兄之資不尚綺紈之好則時故富家子也而劉鳳先賢贊言時之父初以博得婦生時逾歲又博而負人攜之去時少則隨母長乃走會稽山中讀書此委巷流傳之語不足信也又驥所云罹家禍與徐志遭家籍沒語相合昔吳中黨禍起於梁氏莫且記之甚詳豈時即梁氏之族而株連籍沒者耶

陶振字子昌其先華亭人贅於龐山謝氏遂為吳江人

少與謝常同學於楊維楨兼治詩書春秋三經洪武二十三年舉明經授縣學訓導嘗坐佃居官舍逮至京師撰紫金山金水河二賦以進隨奉命撰飛龍在天賦皇太孫以聞遂赦之遷安化教諭卒振天才超逸詩詞豪俊負重名於時所著有釣鰲清嘯二集

參獻集下二傳同

潘檉章曰振才易辭近卑俛爲時格本無足稱而爲經生者本之皆名陶氏學云其所著集中載哀吳王溥詩乃指斥靖難之詞蓋振卒於革除間故也

朱鶴齡曰列朝詩集小傳云振安化教諭歸隱九峯間授徒自給一夕死於虎王達善挽詩曰昔爲海上釣鰲客今作山中飼虎人釣鰲客振自號也愚按子

昌爲吾邑人未聞死於虎所云飼虎人者悲其困處深山祇堪飼虎耳非實事也不然釣鰲客亦豈真有鰲可釣乎

陳謨字昌言初爲童子師於經史正句讀通訓詁而已及沈潛歲久學進理明才思煥發凡唐宋以來大家之文皆含咀其英華規摹其步驟故詞章精敏過人而詩律有含蓄學者宗之同時有徐彰者字天章其學邃於史書長於詩律辭鋒敏捷四座風生每時和景明則與謨治具遊靈巖虎邱諸山窮日夜爲樂所至必聯詩寫景以歸人莫測其蘊也

見獻集

陳玠字以進其先東平人元時有爲州掾史者遂家同

里少從黃本學博綜羣書才識高遠論古人行事成敗必剖析其所以然聽者忘倦為詩追本唐人不以雕琢為工從弟琮字叔正亦能詩書法適美永樂初嘗徵至南京書誥勅未膺一命而終

吳驥字材良同里人家貧力學博聞強記恬於勢利洪熙元年舉明經授濬縣學訓導正統元年改壽昌終清豐教諭教人嚴而有法時稱名師山西河南陝西諸省鄉試凡五聘為考官獻集云正統十二年為山西考官所命詩經題維周之楨犯楚昭王諱禮部請罪之上不問第罰俸一月事見實錄所取皆名士卒年八十三著有蒙庵集歸田橐及同里先哲志驥同時有吳鎮字揚稽能詩見湖海耆英集

莫旦字景周父震見名臣傳旦博學工詩文成化改元領鄉薦卒業太學作一統賢關二賦名動京師後授新昌訓導九年遷南京國子監學正乞歸年八十餘卒旦嘗論吳澂以宋臣仕元不當列從祀趙孟頫以宗室事讐不得為名臣皆篤論也平生著作甚多所存有鱸鄉集新昌嘉魚吳江三志

潘樛章曰邑乘自宋以來歷朱長文竇德遠吳本前後綜述雖方策備存而義例踈闊旦始為諸生即考論掌故搜采舊聞積三十年始成吳江志典雅可觀姚明字景昭一字視卿為人厚重寡言胸中蘊蓄甚富工古今詩文有所作人爭傳以為式生徒滿門謙冲不

伐人皆重其德量家長橋之南號月橋居士成化十三年領鄉薦後兩試南宮皆以疾不終試弘治十二年授廣信貴溪知縣貴溪民稠而土瘠明治以平易百姓安焉府有所需倚辦於縣明罷之府以才諤不足為請調福之南靖在任四年一如貴溪時以母喪歸會有子坐事論死走京師訟之以疾卒於逆旅年六十四門人王哲經紀其喪還塋哀集文章得若干首號月橋遺稿

集

參獻

汝泰字元吉一字其通少有大志歸然老成之望未第時與同郡李應禎吳寬同邑姚明史鑑竝以文學著名所撰文章傳播遠近年五十始登科又八年舉進士拜

南京考功主事時倪岳為南吏部尚書素知泰名一見喜甚居無何岳以召去而泰亦遷驗封郎中三山林瀚代岳任以泰有時望奏改考功泰甄別人物辭情竝至久之擢永州知府卒於官所著有來齋集

姚鏐字汝鳴父澄武義教諭鏐治易旁通羣經游庠校試輒居上等又工詩古文於是才名特起然終不售場屋晚歲應貢適病日御史尚嚴刻竟以老擯廢之卒年七十七

陳理字君明同里人少為諸生器岸軒特文筆雄健博通子史古今雜志及氏族字學正德中提學御史張璿行部再試皆第一因問諸生能為古文者眾以理對命

擬作請立先賢子游後奏記理援筆立就璿稱善久之
 名振一時吳中士大夫家記傳序銘多出其手五舉鄉
 試不第而卒嘗修縣志未就有同川集宋元遺事陳氏
 族譜四禮規諸書藏於家參文徵
 陳策字獻可博極羣書詩文冲暢典核嘉靖元年舉人
 授曹縣教諭卒於官繼室丁氏哀慟嘔血數升而殞曹
 人義之策所著有說鈴九華集東行集曹縣志

王寵字履仁更字履吉別號雅宜兄守見名臣傳寵資
 性明敏少與其兄同學於蔡羽居洞庭三年既而居石
 湖之上又二十年非歲時省侍不至家遂於書無所不
 窺文藝無所不能為人蘊藉自將溫淳恬曠與物無競

所最相善者文徵明唐寅而知府胡纘宗亦深器重之
 嘗有人持千金欲得其一言於纘宗寵不顧麾之其父
 尤焉寵謝曰人所為重寵者能潔脩耳使自污將見輕
 而又因為利耶其有守如此寵才名過其兄兄早貴致
 身華要而寵八試棘闈不利僅以年資貢太學竟齋志
 以卒年才四十有文集二十卷二獻集詩刻尚風骨擺

脫輕靡書體迥秀妙得晉法與祝允明齊名參列朝詩集
史寵傳但云行楷得晉法書無所不觀而不詳其詩
 沈位字道立祖漢見名臣傳父嘉謨字惟承國子監生

性仁孝好讀宋儒書能詩嘗識杜氏兒於豎中偉其器
 遂名之曰偉而子之後果為廉吏成大儒人服其鑒參

坤撰墓誌

位少樵魯而克自奮博學強識嘉靖四十三年舉

鄉試第一隆慶二年成進士改庶吉士尋授檢討與修

世宗實錄五年冊封肅王克副使還為漕卒所傷卒於

道年四十四始位治舉子業即攻古文與唐順之茅坤

遊得其指授及讀書中秘肆放厥詞兼廬陵眉山體法

論者推為吾邑古文家之首著有柔生齋橐沈氏族譜

等書

參文徵

弟倬字道章讀書過目成誦詩文立就爽健

而中紀律為諸生連試第一督學耿定向尤盛稱之文

譽與管志道焦竑而終不得舉年三十一卒著有紀

志橐

參馮時可撰墓誌

位與倬皆善事親雖異母而極相友愛

居鄉亦竝多厚德懿行云

俞安期字羨長少厭薄舉子業嗜古學寓目輒上口遂

專攻詞賦徙居宜興又徙金陵以布衣遊歷海內公卿

間巨目高鼻魁顏長身抵掌議論豪氣勃發見者以為

非常人也又嘗周覽五嶽所至觴酌流行絲肉竝奏酒

酣坐歡俯仰長嘯聽者嘆有鸞龍之音與龍宗武丁應

泰為意氣交宗武遣戍永安不遠千里送之應泰沒厚

遇其子有古烈士風詩名與王叔承相埒叔承歌行豪

宕安期律切精深所撰明朝鏡歌以今題代古曲為文

士所稱時京山李維楨侯官曹學佺為文壇雄伯皆折

節下之安期博學宏覽撰述甚富所著有琴琴集數十

卷所輯有唐類函詩啓雋類函數百卷盛行於代其釋

藏道藏二函未成子二長棄家爲高僧次南史字無殊亦工詩和雅冲澹類其爲人

參獻集文徵

周輯符字泰六博古好學詩宗宋元其五七言近體温麗典雅直可比肩唐人晚年以子宗建知仁和就養官舍觀書多慨類纂成編名曰虎林八訂頗有裨於世文

震孟爲之序

參家譜

張世偉字異度曾祖銓見名臣傳祖基見儒林傳父尙友文行見推於時以諸生終世偉有才思兼工古今文詞少從父遊婁江王世貞及王錫爵許爲國器受知督學使者陳子貞厚賻其父之喪聲名籍甚一時海內才士皆與締交頗恃才簡傲萬曆四十年年幾五十始舉

順天鄉試而忌者構飛語劾以關節至對臺獄罰三科天啓元年覆試乃得白屢會試不第遂築室名泌園讀書其中崇禎七年巡撫張國維巡按祁彪佳薦舉賢良方正力辭不就年七十四卒貧無以歛理刑倪長珩往賻乃得發喪學者私謚之曰孝節先生福王時禮部題贈翰林院待詔著有泌園集若干卷行世

參文徵府志

葉燮曰張氏自銓以來世有清望世偉負才名矯激自喜郡中賢縉紳皆左右之而世偉復高自標置客過概不報謁一時遂稱爲真孝廉云

卜舜年字孟碩盛澤人少孤喜爲詞賦攻書畫年十八受知於秀水知縣顏欲章遂補諸生讀書廢寺小樓四

顧皆墟墓又無窻櫺風雨寒暑吟誦不輟旁及河洛識
 緯支干營陣之學屢試不利家益貧乃為奇服驚眾聞
 吳門張懷仙善音能感愴人遂從學吳歛盡得其妙有
 時或自登場按節一轉四座掩泣頗以此自快己更學
 仙講飛舉之術恣情自放竟以瘵死年僅三十四舜年
 志氣儁爽為詩文天趣甚高而不循矩度故名不出州
 里有遺集四卷所善潘一桂為之刊行時有莊汝培字
 端甫與舜年唱和最富舜年詩思敏捷而汝培以沈著
 勝然兩人更相推重也參獻集有與舜年同里居者仲紹
 顏字爾膺亦有俊才好讀書能詩年二十二中萬曆丙
 午副榜不二年病卒有遺集四卷舜年欲序而傳之會

舜年卒遂散佚

潘一桂字無隱一字木公黃溪人父以賈僑居京口一
 桂少機警過目成誦頗自負不肯專心吟諷父怒命之
 揚州賈一桂乃更讀書為歌詩自謂無意學古而神與
 之似詩成輒書屋壁間湖州沈聖岐以宦游道揚州見
 壁間詩大驚勸歸就學年十六補邑諸生又念賦學衰
 廢思一振起之乃杜門研思作東征昌言諸賦閱博奇
 詭為時所稱僦居京口覽江山之勝以詩文自高年二
 十餘歸故里諷習楚辭嘗懸肘後其結撰益工崇禎五
 年唐世孫好詞賦延四方賓客起高明樓擬於雁池兔
 園以書幣招之再三辭家人怪之一桂嘆曰極知世孫

嚮我厚然國法不得與藩邸交我何敢為亂首耶後遊襄陽世孫已立為王遣使迎候不絕於道一桂不得已命駕往王數從授簡賦詩雍容應教居一月稱疾辭歸期年王廢同時在國中者皆株連坐法一桂獨以見幾得免卒年四十五有中清堂集六卷行於世古韻通考二十卷未刻子陸字江如有志節於詩律尤精本舊志參獻集錢謙益曰無隱詩多宏麗今集為史弱翁所定多取其膚立者賦則為西極文太青所推太青以揚馬自負曰無一世見無隱諸賦曰我心折氣澁矣無隱之可傳者其在斯乎見列朝詩集湯三俊字俊民盛澤人邑諸生少有才氣通世務知武

略崇禎七年總督三邊侍郎陳奇瑜以討流寇請參軍謀書檄奏記援筆立成未幾卒於三原道中有貯真齋

遺集四卷參屈志

沈自徵字君庸國子監生父琬見名臣傳自徵幼自負喜談兵為大言父授以田五十畝乃笑曰吾家祖業恒豐自父以清苦結百姓歡載家租往餉官署而先業墮焉有世上男子而五十畝者耶一朝盡棄之得二百金調周親饗賓客立盡天啓末入京師遂遊歷西北邊塞窺其形勝還而疊疊談不置於山川陸原要害如視諸掌居京師十年為諸大臣籌畫兵事皆中機宜名聲大振而橐中亦累數千金乃歸出裝置房舍於府城之闔

門甚宏麗置良田千畝給昆弟宗族及故人數百金已
 念母早喪未嘗一日養盡取所置房舍田畝歸釋氏宮
 資母冥福仍作窶人隱於邑之西鄉茆屋躬耕豁如也
 崇禎七年葉紹顥巡按廣東海寇劉香作亂遣使問策
 自徵密函授計紹顥遂與平兩廣受勅獎十三年國子
 監祭酒某薦諸朝以賢良方正辟自徵曰吾肆志已久
 豈能帶腰冠首受墨吏束縛耶辭不就明年卒於家年
 五十一自徵穎悟絕人為詩文立就不一體亦不錄橐
 故無集惟做元人為鞭歌伎霸王亭秋簪花髻三曲以自
 寓友人刊之行世論者咸目為明以來北曲第一云參
禎野 兄自繼字君善國子監生工詩文尤善集唐性耿
乘

介有時佚誕似晉人明亡隱居平坵年六十七卒著有
 平坵集四種

按葉志自徵傳載其應大司馬之募說袁崇煥入朝
 因以崇煥之得正法為自徵一說之力今考之明史
 崇煥之赴援有功無罪特為 本朝所間故莊烈帝
 召而誅之則自徵之用說誤也又崇煥始至帝立召
 見深加慰勞初未有擁兵不朝之疑既都人以驟遭
 兵怨崇煥而謗其縱敵擁兵帝聞乃不能無惑故
 本朝之間得行是自徵用說當在此時然當時廷議
 恐其拒命而崇煥本無他意則其請入朝亦豈盡由
 自徵陳說大義之力乎故今削而不錄

沈自然字君服自徵弟邑諸生沈氏世有文采而自然獨工歌詩爲人孤峭絕俗少許可常終日瞪目兀坐家貧蔬食時絕然閉門諷詠不輟終未嘗干人所爲詩與潘一桂史元徐白俞南史齊名號松陵五才子自然於世所稱賢豪長者一語不合輒嫚罵去以故名不出吳中而山陰祁彪佳官於吳深知自然才每造請讌飲虛已商榷自然亦爲之盡自然以苦吟早衰後居母喪神傷骨立數月而卒族人私謚爲孝介先生妻嚴氏素賢以痛自然故數月亦卒鄉國聞者無不傷之

本獻集參屈志

葉燮曰君服工於詩其詩摹李義山入堂奧年未四十死貧不能殮世無退之其窮更甚於東野矣

史元字弱翁父遺直見震澤志元自幼居柳胥村天才雋拔學有根柢與吳易趙渙以詩古文相切劘有東湖倡和集三人者才氣相埒也易成進士而元與渙俱不偶元留心經濟嘗從水道至京師作河行注一卷鹽筴河漕之要略具焉數以策干公卿終無所遇而歸旣易死國難元亦貧悴以死詩宗少陵老健無敵古體尤工渙字少文學行醇謹詩工五言先易卒

本獻集

大清

沈自南字留侯自然弟少孤刻苦力學崇禎九年舉於鄉讀書養母不聞外事知縣葉翼雲以真孝廉目之甲申乙酉間隱居同里湖濱絕跡城市爲律陶詩四十首

以見志順治中禮部督會試急奉母命入都九年中進士又三年殿試復告歸閉戶著述十餘年始謁選授山東蓬萊知縣清介自矢以恩撫民而不能事上官上官方求瑕索垢適至邑諭民訐知縣罪竟日無一人應者益怒遂劾免之自南處之怡然但書於坐隅曰問今之事天與其人與以吾所行貧也非病也無何卒於宦邸年五十五邑紳尚書沙澄爲文以弔有清官可爲不可爲蒼天可問不可問之句覽者悲焉著有藝林彙考幾二百卷及歷代紀事考異樂府箋題等書其藝林彙考錢謙益爲之序嘗先刻三十八卷行世餘橐藏其家子永義字二聞永智字四明皆謹厚工詩爲舅氏顧有孝所

稱孫始樹字景馮博學強識文辭高古秀水朱彝尊推重之以爲能世自南之業其爲人耿介絕俗亦有祖風葉燮曰琬與自南兩世爲真廉吏自繼自徵自炳自然自駟自南兄弟六人皆以文學有盛名鄉黨以爲美談

計東字甫草茅塔人父名故名士東自幼好跳盪父友吳翮獨器之妻以女年十五補諸生文譽日起遭亂家居取經史諸書盡讀之講求義理指歸治亂得失之要旁及權衡兵法陰陽占候之術嘗著籌南五論上閣部史可法可法奇之順治十四年中順天鄉試御試第二名動長安三試禮部不第旋遭奏銷案被黜旣不得

志乃出游四方嘗自京師北走宣雲南歷洛漳邢魏東
 之濟兗所至結交賢士大夫詩文縱橫跌宕務極其才
 力而後已對客議論風發一坐盡傾時或憤激怒罵人
 皆以狂目之卒年五十二所著有改亭集見新府志子準字
 念祖三歲讀毛詩五歲就外傳知向學事親孝母弟不
 率教必長跪自責與人交冲和無崖岸嘗半日讀書半
 日靜坐年十四補諸生至十六而夭其父執及丹生私
 諡為志學孺子見詩粹從孫朱培字傳一好學重交遊為
 諸生有名年八十餘卒嘗做韓詩外傳體著尚書外傳
 若干卷積二十年三易橐而成臨歿猶沉吟訂正某卷
 某行呼其孫改訖而後瞑目

顧偉字英白同里人少嗜學乙酉後絕意進取盡發所
 藏古人書研辨討論自四子五經綱目諸史以至司天
 職方律曆算數經脉藥石卜筮占候之書莫不探其原
 委得其關鍵爛溪潘檉章聞其善曆學請推日至一握
 算而得因定交焉偉貌古朴言呐呐如不出口及質以
 經史疑義則響應不窮為人外和內介非義不取雖飢
 寒不妄就人竟窮約以死偉所著名格軒遺書凡按注
 十五種選訂八種編輯二十二種吾邑著述家鮮有若
 偉之富者然偉未嘗表襮於人人亦罕知之歿後其橐
 始稍出檉章弟未自以續松陵獻集時述偉事未備乃
 序其書而盛稱之本獻集續纂時同里又有章夢易字

兩生少不舉子業有盛名爲陳際泰艾南英輩所稱許
中年棄去潛心經子晚更喜釋氏書爲人能忍飢不惑
於財色樂救人危嘗脫人於死者三而不使其人知年
八十餘卒著有周易筌毛詩雞跖集春秋左氏兵法楚
辭改註詩源續同里先哲志等書

本獻集續纂續
先哲志自序

任大任字鈞衡同里人邑諸生性好學務綜貫經史子
集於詩與中庸所得尤邃家貧課徒事母不慕祿利與
徐枋包捷輩相過從年踰八十思其親猶悲泣康熙中
卒所著有易學綱領詩經解中庸解等書

本沈德潛
撰墓誌

葉燮字星期父紹袁見節義傳燮自幼能詩古文其詩
務爲驚人語以杜韓蘇爲宗其古文宗大蘇任筆所之

千言立就康熙九年以浙籍舉人成進士十四年選知
揚州寶應縣時調兵討三藩驛站夫馬倍增而裁存銀
不及需用之半運河隄爲黃淮溢決者至百六十里燮
多方措辦軍需無缺河隄得完然性簡傲不能事上官
上官惡之不二年被劾歸遂攜家入吳之橫山築小園
顏曰獨立蒼茫處又顏其草堂曰二棄著述其中巡撫
宋犖聞其名嘗減從往訪辭不見犖曰獨立蒼茫處容
一立否延佇久之乃去燮亦不往報也燮嘗就知縣郭
琇聘纂修邑志務簡嚴三月而就與所著已畦集竝行
於世先是屈運隆爲縣志有成稟識者頗嫌其蕪舛故
琇屬燮重修之然運隆搜輯之勤亦不可沒云運隆字

駿聲邑諸生以孝友稱於家燮從子舒崇舒穎舒崇字元禮幼有神童譽及長詩古文名振一時遊京師公卿稱美不置康熙十五年成進士授中書舍人大學士立德爵溥薦博學宏詞科不及試卒於京邸年三十九所著宗山集謝齋詞行世舒穎字學山順治間中副榜工詩爲徐白顧有孝所稱許

潘耒字次耕曾祖志伊見名臣傳耒幼孤資稟穎異嘗閱曆日一過能背誦及長於羣經諸史九流之書無不讀詩賦古文辭無不能而性好山水遂往來燕趙與一時名人縱遊相討論題詠康熙十七年以博學鴻詞徵試除翰林院檢討纂修明史旣受職謂明更三百年史

事繁委宜博采而精於考證分任而一其義例秉筆嚴而論平歲月寬而帙簡因作議以上總裁然之令撰食貨志兼訂紀傳自洪武以下五朝彙皆其所定

上平逆藩耒獻平蜀平滇兩賦

上稱賞公卿傳誦論者擬諸李白云進克日講官知

起居注兼纂修

世祖實錄

聖訓復爲會試同考官得士十二人皆天下選而名益起忌者亦益衆後竟以甄別議坐浮躁降調遂歸耒初被徵以母老力辭不獲命乃行除官後又牒吏部以獨子終養請代題者三卒不得請乃受職遂迎母養之及

去職母歿終三年未嘗見齒後乃復徧遊羅浮天台雁蕩武夷黃廬中岳諸名山盡窮其勝各爲詩若文記之四十二年未已家居

上南巡復未原官越三年

上又南巡陳廷敬扈 駕欲薦起未未固辭乃止未於聲韻反切有神悟隨所至審辨遂通其微著類音八卷以爲舊字母三十六有複有漏今刪五增十九成五十五母各具陰陽而列以喉舌腭齒唇之序舊四呼以音就字無定準今各母各韻竝列四呼字缺而音悉全舊分類互有得失今統有字無字之音辨其全分分平上去爲二十四類入爲十類卽少攝多正轉從轉旁轉別轉

條理井然舊切同母同韻之字皆通用今同母之中必用同呼同轉同韻之中必用元音分陰陽蓋皆得天然之音而無有譌闕論者謂於古今音學中實成一家言晚研究易象數多心得著論十三篇所爲文甚夥往往禪治體風教與鄉邑之利病蓋未嘗師事同郡顧炎武徐枋實稟承其教其史學則自少得諸兄檀章賦學則未所自得也未詩文共四十卷名遂初堂集自京師歸凡二十餘年年六十有三卒少子其燦字景瞻康熙末舉人年三十六卒好學工詩有詩集三卷

徐鉞字電發西濠港人父韞奇孝友仗義嘗破家脫從子於難爲諸生好古博學積書至數千卷明亡杜門著

述以終鈞幼穎敏年十三吟詩有驚人句旣而工爲詞兼通古文及制舉業入慎交社聲譽日起嘗兩至京師公卿皆折節與交尤見知於大司農梁清標會開博學鴻詞科清標薦之 召試授翰林院檢討纂脩明史逆藩旣平鈞作平蜀頌平滇雅以獻其後值翰林外轉鈞以忤權貴意亦在列湯文正斌力爲調護不能已有厚鈞者謂曰吾爲君行金非但免黜學使且可得也鈞曰出處有定數安用此遂歸鈞好遠遊道浙過閩歷江右入兩粵往中州所至名流勝侶皆喜從遊鈞所留題人珍傳焉

上南巡

賜御書

詔原官起用有司趣行鈞感壯歲

外轉事竟不起於屋後園中築小亭顏曰豐草與遠近耆宿日觴咏其間悠然忘老鈞少時所刻菊莊詞朝鮮貢使仇元吉見之以金餅購去留題曰中朝覓得菊莊詞讀罷烟霞照海湄北宋風流何處是一聲鐵笛起相思其爲遠人傾慕如此所著有詞苑叢談本事詩南州草堂集等書子養浩能讀父書尤精水利之學張清恪伯行撫吳時聘諸宿學修吳中水利書養浩與焉書未成橐藏於家

陳銳字穎長弟鏗字霜赤父紹文見隱逸傳銳鏗皆生有異質未弱冠相繼爲名諸生 國初制義承明季之習怪詭不經銳鏗力宗先正選刻程墨皆醇百篇風行

海內文體由此稍變既久困場屋遂肆力於詩古文辭亦竝有聲後銳成康熙二十七年進士鶚以歲貢入成均皆不及仕而卒兩人竝克修內行不苟取予鶚之卒以母喪哀毀人尤重之鶚子沂震字起雷博學工詩有盛名由進士歷官禮科給事中康熙中廷試稱旨命督學山東遷刑科掌印給事中所著有狷亭集

李寅字露楨歲貢生少穎悟博覽圖籍能詩古文既而專事經學每讀一經必考核傳註箋疏而折衷於宋五子之書其持論以踐履爲實以體認天理爲本執親喪哀毀如禮祭必盡誠友愛伯兄常依依如童稚時撫其子同於己子持躬斬斬非義不履與人接和氣藹然年

七十一卒生平著述甚多其學庸要旨儀封張伯行稱

之本朱軾撰傳

周龍藻字漢荀曾祖宗建見名臣傳龍藻性穎異好書髫年患痘未脫痂已篝燈讀帷中比長習虞山堯峯之緒言中年讀顧亭林書豁然有省曰學之條貫當如是其於書無不覽而尤肆力於詩始出入香山眉山之間繼而原本風騷根柢韓杜凡學問思辨所得喜怒哀樂所發一寫於詩故格律愈嚴寄託愈遠家故東林後人習聞前朝故實後益蒐覽國史及紀載之書強識不忘竝能述其本末故史學爲時推重爲人識高氣英論人是非辨事黑白斷斷不稍假借自守甚嚴雖困不事干

謁嘗處嫌疑之地無纖芥私蓋於學實有得力焉龍藻
爲諸生試輒首列後以年資克貢年六十五卒所著有
恒齋詩集四十卷散體駢體文十卷

以上皆在分縣前者

周振業字右序龍藻從兄家貧力學於六行無不敦旣
爲諸生從桐鄉朱彝游知近世王學之謬遂專事宋五
子之說以治四書沈潛研極洞徹闡奧有就質者常百難
而其答不窮然未嘗以講學爲名亦不著書惟舉場所
作性理論今存九篇其中多微言大義皆發五子之蘊
而能牖迪後人蓋我邑自元明以來之儒未有遠於性
理如振業者其敦六行也由事親以及族姻朋友盡其

分無不及焉於有難有侮有喪者恤之禦之經紀之雖
歷寒暑風濤陷穽無或辭焉往郡城遇故人子於途見
其寒解衣衣之忍凍而歸遂病卒時雍正九年年七十
一振業少壯時文名甚盛至老乃以歲貢中副榜詩亦
有名而不苟作文行世詩藏於家振業族兄之方字在
卿業織纈以養親好誦書且織且誦久而思體之於身
謹言信行自號希硜子以見志多所著述振業序其集
盛稱之

周廷諤字美斯邑諸生七世祖大章見名臣傳廷諤少
從長洲宋實穎遊實穎愛其才以外孫女妻之旣而學
詩有警句爲前輩顧有孝稱賞廷諤益自奮肆力於唐

宋諸大家老而彌篤嘗以邑人之詩自明迄今分見於詩乘詩略者不下數百家乃合選之復廣搜補闕仿列朝詩集例人爲小傳考其源流派別論斷有據美惡不相掩名曰吳江詩粹又續成兄欽所輯吳江文粹凡四方與邑人所作詩歌序記碑銘傳贊書啓題跋之關吾邑典故者皆錄焉又自錄所爲詩文曰笠澤文鈔竝藏於家嶽字瞻奇亦諸生好讀書著述甚富年止三十九周朱耒字象益八世祖用見震澤志朱耒幼孤外大父朱彝尊食而教之補秀水諸生後入都館大學士陳廷敬邸舍以能詩文工箋註知名康熙五十二年 詔九卿薦舉海內實學之士可備顧問者副都御史李濤侍

郎郝林合疏薦朱耒未及用會翰林編修萬經督學貴州延往入幕時白潢爲經屬知府嘗乞經撰其母墓誌經轉屬朱耒潢得文大喜旣而知出朱耒手甚重之及潢巡撫江西遂委以章奏文檄其修通志亦與焉雍正三年江總督查弼納薦朱耒品端才練時朱耒已援例授知州銜五年引見 命往雲南試用道遭疾歸卒年五十三朱耒敦厚有行誼外大父故貧歿後家益困朱耒歲具錢米直百餘金以爲常其推恩族黨資給故交亦皆久而不倦所著有童初室詩文彙

顧我錡字湘南同里人邑諸生博學強識爲詩古文提筆疾書千言不竭給事陳沂震以詩名我錡從之游詩

學日進及沂震督學山東我錡在其幕與嘉興高孝本
同邑周龍藻及沂震相倡和爲海岱聯吟集龍藻嘗謂
曰子年未三十而詩語老鍊如是不可及也大學士鄂
爾泰官江蘇布政時得我錡詩文稱爲南國才人冠雍
正九年督撫聘諸名士修江南通志我錡分任藝文參
及人物江防職官諸類同事者推服焉我錡性孝友居
母喪哀毀踰禮又以修志積勞遂發疾卒年四十六所
著有通鑑綱目志疑浣松軒集等書

吳江縣志卷之三十二

